



盧照鄰集卷上

賦

秋霖賦

覽萬物兮竊獨悲此秋霖風橫天而瑟瑟雲
覆海而沉沉居人對之憂不解行客見之思
已深若乃千井埋煙百廛涵潦青苔被壁綠
萍生道於時巷無人跡林無鳥聲野陰霾而
因晦山幽曖而不明長塗未半茫茫漫漫莫
不埋輪據鞍銜悽茹歎借如尼父去魯圍陳

圖書

會社

畏匡將飢不爨欲濟無梁問長沮與桀溺逢
漢陰與楚狂長櫛風而沐雨永樓樓以遑遑
及夫屈平既放登高一望湛湛江水悠悠千
里泣故國之長秋見玄雲之四起嗟乎子卿
北海伏波南川金河別鴈銅柱辭鳶關山天
骨霜木凋年眺窮陰兮斷地看積水兮連天
別有東國儒生四都才客屋漏鉛槧家虛甌
石茅棟淋淋蓬門寂寂蕪碧草於園徑聚綠
塵於庖甕玉為粒兮桂為薪堂有琴兮室無

人抗高情以出俗馳精義以入神論有能鳴
之鴈書成已泣之麟覩皇天之淫溢孰不隅
坐而含頰已矣哉若夫繡轂銀鞍金杯玉盤
坐卧珠璧左右羅紈流酒為海積肉為巒視
襄陵而與昏墊曾不輟乎此歡豈知乎堯禹
之臞瘠而孔墨之艱難

馴鳶賦

孕天然之靈質稟大塊之奇工嘴距足以自
衛毛羽足以凌風懷九圍之遠志託萬里之

長空陰雲低而含紫陽景升而帶紅經過巫
峽之下惆悵彭門之東既而摧枯短翮寥落
長想忌蒙莊之見欺哀武溪之莫徃進謝扶
搖之力退慙歸昌之響腐食多懼層巢無像
屈猛性以自馴抱愁容而就養於是傍眺德
門言栖仁路不踐高梁之屋翔止吾人之樹
聽群雞於月曉侶群鵲於星暮狎蘭砌之高
低翫荆扉之新故循廣庭之一息歷長簷而
逕度若乃風去雨還河移月落徘徊亂於雙

燕鳴舞均乎獨鶴乍嘯聚於霞莊時追飛於
雲閣荷大德之純粹將輕姿之陋薄思一報
之無階欣百齡之有託

窮魚賦并序

余曾有橫事被拘為群小所使將致之深議
友人救護得免竊感趙壺窮鳥之事遂作窮
魚賦常思報德故冠之篇首云

有一巨鱗東海波臣洗靜月浦涵丹錦津映
紅蓮而得性戲碧浪以全身宕而失水屈于

陽瀕漁者觀焉乃具竿索集朋黨鳧趨雀躍
風馳電往競下任公之釣爭陳豫且之網螻
蟻見而甘心獮獺聞而抵掌於是長舌利嘴
曳綸爭鈎拖鬚挫鬣撫背扼喉動搖不可騰
踴無由有懷織潤寧望洪流大鵬過而哀之
曰昔子爲鯤也與爾遊乎自予羽化之後爾
其遺孤俄撫翼而下負之而趨南浮七澤東
汎五湖是魚也已相忘於江海而漁者猶悵
望於泥塗

病梨樹賦 并序

癸酉之歲予卧病於長安光德坊之官舍父
老云是鄱陽公主之邑司昔公主未嫁而卒
故其邑廢時有處士孫君思邈居之君道洽
今古學有數術高談正一則古之蒙莊子深
入不二則今之維摩詰及其推步甲子度量
乾坤飛鍊石之竒洗胃腸之妙則其甘公洛
下閔安期先生扁鵲之儔也自云開皇辛酉
歲生今年九十二矣詢之鄉里咸云數百歲

人矣共語周齊間事歷歷眼見以此參之不
啻百歲人也然猶視聽不衰神形甚茂可謂
聰明博達不死者矣余年垂強仕則有幽憂
之疾椿菌之性何其遼哉于時天子避暑甘
泉邈亦徵詣行在余獨病卧茲邑闔寂無人
伏枕十旬閉門三月庭無衆木唯有病梨樹
一株圍纔數握高僅盈丈花實憔悴似不任
乎歲寒枝葉零丁絕有意乎朝暮嗟乎同託
根於膏壤俱稟氣於太和而修短不均榮枯

殊貫豈賦命之理得之自然將資生之化有
所偏及樹猶如此人何以堪有感於懷賦之
云耳

天象平運方祇廣植挺芳桂於月輪橫扶桑
於日域建木聳靈丘之上蟠桃生巨海之側
細葉枝連洪柯條直齊天地之一指任烏兔
之棲息或垂陰萬畝或結子千年何偏施之
雨露何獨厚之風煙愍茲珍木離離幽獨
茂實於河陽傳芳名於金谷紫澗稱其殊旨

玄光表其仙族爾生何為零丁若斯無輪奐
之可用無棟梁之可施進無違於斤斧退無
競於班倭無庭槐之生意有巖桐之死枝爾
其高纔數仞圍僅盈尺脩幹罕雙枯條每隻
葉病多紫花凋少白夕鳥怨其巢危秋蟬悲
其翳窄怯衡飈之搖落异炎景之臨迫既而
地歇蒸霧天收耀靈西秦明月東井流星惟
悴孤影徘徊直形狀金莖之的的疑石柱之
亭亭若夫西海夸父之林南海蚩尤之樹莫

不摩霄拂日蔽雲吐霧别有橋邊朽柱天上
靈槎年年歲歲無葉無花榮辱兩齊吉凶同
軌寧守雌以外喪不修裸而內否亦猶縱酒
高賢佯狂君子為其脗合置其憂喜生非我
生物謂之生死非我死谷神不死混彭殤於
一觀庶筌蹄於茲理

雙槿樹賦同崔少監作并序

蓬萊山上即對神仙芸香閣前仍觀祕寶金
懸秦市揚子見而無言紙貴洛城陸生聞而

罷笑故知柔條朽幹吹噓變其死生落葉凋
花剪拂成其光價方且傳石渠之故事得槿
樹之新名足以脂粉仙臺丹青祕府者也君
布衣黎杖巖栖藿而非史處漢代而無田學
涉蕪淺文多瞽漏宜其屏竄用其靜默蓋窮
而思達人之情也卑而應高物之理也故疾
雷作而蟄虫飛浮雲興而石鳥潤不可廢也
雖云聖朝多士而公實居之草澤有人亦國
家之美事也故復獎劬鄙作雙槿樹賦詞

義猥薄退增慙覲謹啓賦曰

方丈蓬萊邈矣悠哉芸局石室圖天揆日若
乃羲和掌日太史觀星銅渾玉策寶笥金銘
地則圖書之府人則神仙之靈中有芳薜鬱
鬱亭亭徒觀其兩砌分植雙岵並耀葉鏤五
衢榮分四照紛廣庭之霍靡隱重廊之窈窕
青陸至而鶯啼朱陽升而花笑紫蒂紅粧玉
蕊蒼枝露華的皜風色徘徊糝糝衰颯婀娜
隈綏迫而視之鳴環動珮歌扇開遠而望之

連珠合璧星漢迴狀仙人之羽蓋疑佚女之
瑤臺寂寞攸利栖閑此地委命卷舒隨時榮
悴外無嬰天之禍內有逍遙之致朝朝暮暮
落復開歲歲年年紅以翠若夫遊蜂戲蝶封
其萼輕煙弱霧絡其條去不謂之損來不謂
之饒故能出君子之殊俗入詩人之舊謠齊
顯昧於兩曜效生死於一朝同喪我之非我
固雖凋而不凋則有亭伯儒門令思詩友翰
苑擴其吞夢文鋒高而照斗詠蕪滋之朝夕
悲積薪之先後縟綉起於緹紡煙霞生於灌
莽豈與幽巖弱條澗底枯松徒冒霜而停雪
空集鳳而吟龍詎得奉闈之廣價連筆匠之
爲容已矣哉東方生聞而歎曰故年花落不
留人今年花發非故春倏兮夕隕忽兮朝新
侏儒何功兮短飽曼倩何負兮長貧聊寄詞
於庭樹倘有感於平津

五言古詩

羈卧山中

卧壑迷時代行歌任死生紅顏意氣盡白壁
故交輕澗戶無人迹山窓聽鳥聲春色緣巖
上寒光入溜平雪盡松帷暗雲開石路明夜
伴飢鼯宿朝隨馴雉行度溪猶憶處尋洞不
知名紫書常日閱丹藥幾年成扣鍾鳴天鼓
燒香厭地精倘遇浮丘鶴飄飄凌太清

關山月

塞垣通碣石虜陣抵祈連相思在萬里明月
不長懸影移金岫北光斷玉門前寄言閨中

婦愁看鴻鴈天

上之回

回中道路險蕭關烽候多五營屯右地萬乘
出西河單于拜玉璽天子按雕戈振旅汾川
曲秋風橫大歌

紫騮馬

騮馬照金鞍轉戰入皋蘭塞門風稍急長城
水正寒雪暗鳴珂重山長噴玉難不辭橫絕
漠流血幾時乾

劉生

劉生氣不平，抱劍欲專征。
報恩爲豪俠，死難在橫行。
翠羽裝劍鞘，黃金鏤馬纓。
但令一顧重，不恡百身輕。

結客少年場行

長安重游俠，雒陽富才雄。
玉劍浮雲騎，金鞭明月弓。
鬪鷄過渭北，走馬向關東。
孫賓遙見待，郭解暗相通。
不受千金爵，誰論萬里功。
將軍下天上，虜騎入雲中。
烽火夜似月，兵氣曉

成虹橫行，徇知己，負羽遠從戎。
龍旌昏朔霧，鳥陣捲胡風。
追奔瀚海，咽戰罷陰山，空歸來。
謝天子何如，馬上翁。

贈李榮道士

錦節銜天使，瓊仙駕羽君。
投金翠山曲，奠壁清江濱。
圓洞開丹鼎，方壇聚絳雲。
資貺幽難識，空歌迥易分。
風搖十洲影，日亂九江文。
敷誠歸上帝，應詔在明君。
獨有南冠客，耿耿泣離群。
遙看八會所，真氣曉氛氲。

早度分水嶺

年年遊蜀道萬里向長安徒費周王粟空彈
漢吏冠馬蹄穿欲盡貂裘敝轉寒層冰橫九
折積石凌七盤重谿旣下漱峻峯亦上干隴
頭聞戍鼓嶺外咽飛湍瑟瑟松風急蒼蒼山
月團傳語後來者斯路誠獨難

三月曲水宴

風煙彭澤里山水仲長園由來棄銅墨本自
重琴樽高情邈不嗣雅道今復存有美光時

彥養德坐山樊門開芳社逕室距桃花源公
子黃金勒仙人紫氣軒長懷去城市高詠狎
蘭蓀連沙飛白鷺孤嶼嘯玄猿日影巖前落
雲花江上翻興闌車馬散林塘夕鳥喧

奉使益州至長安發鍾陽驛

躋險方未夷乘春聊騁望落花赴丹谷奔流
下青嶂歲稔曉樹滋澁瀆春江漲平川看釣
侶狹徑聞樵唱蝶戲綠苔前鶯歌白雲上耳
目多異賞風煙有奇狀峻阻將長城高標吞

巨舫聯翩事羈勒辛苦勞疲恙夕濟幾溷溷
晨登每惆悵誰念復芻狗山河獨偏喪

和王夔秋夜有所思

秋寂南軒夜悠然懷所知長河落鴈苑明月
下鯨池鳳臺有清曲此曲何人吹丹唇間玉
齒妙響入雲涯窮巷秋風葉空庭寒露枝勞
歌欲有和星鬢已將垂

詠史

季生昔未達身辱功不成髡鉗為臺隸灌園

變姓名幸逢滕將軍兼遇曹丘生漢祖廣招
納一朝拜公卿百金孰云重一諾良匪輕廷
議斬樊噲群公寂無聲處身孤且直遭時坦
而平丈夫當如此唯唯何足榮

二

大漢昔云季小人道遂振玉帛委奄尹斧鑕
嬰縉紳邈哉郭先生卷舒得其貞雍容謝朝
廷談笑獎人倫在晦不絕俗處亂不為親諸
侯不得友天子不得臣冲情甄負醜重價折

角巾悠悠天下士相送洛橋津誰知仙舟上
寂寂無四鄰

三

公業負奇志交結盡才雄良田四百頃所食
常不充一為侍御史慷慨說何公何公何為
敗吾謀適不同仲穎恣殘忍廢誠良在躬死
人如亂麻天子如轉蓬干戈及黃屋荆棘生
紫宮鄭生運其謀將以清國戎時來命不遂
脫身歸山東凜凜千載下穆然懷清風

四

昔有平陵男姓朱名阿游直髮上衝冠壯氣
橫三秋願得斬馬劍先斷佞臣頭天子玉鑑
折將軍丹血流指生不肯拜視死其若休歸
來教鄉里童蒙遠相求弟子數百人散在十
二州三公不敢吏五鹿何能酬名與日月懸
義與天壤儔何必疲執戟區區在封侯偉哉
曠達士知命固不憂

望宅中樹有所思

我家有庭樹秋葉正離離上舞雙棲鳥中秀
合歡枝勞思復勞望相見不相知何當共攀
折歌笑此堂垂

宿晉安亭

聞有絃歌地穿鑿本多奇遊人試一覽臨觀
果忘疲窓橫暮落葉簷卧古生枝舊石開紅
新荷覆綠池孤猿稍斷絕鳥復參差汎
灑月華曉徘徊星鬢垂今日剛書客悽惶君
詎知

于時春也慨然有江湖之思寄贈柳

九隴

提琴一萬里負書三十年晨攀偃蹇樹暮宿
清泠泉翔禽鳴我側旅獸過我前無人且無
事獨酌還獨眠遙聞彭澤宰高弄武城絃形
骸寄文墨意氣託神仙我有壺中要題為物
外篇將以貽好道道遠莫致旃相思勞日夜
相望阻風煙坐惜春華晚徒令客思懸水去
東南地氣凝西北天關山悲蜀道花鳥憶秦

川天子何時問公卿本亦憐自哀還自樂歸
藪復歸田海屋銀為棟雲車電作鞭倘遇鸞
將鶴誰論貂與蟬萊洲頻度淺桃實幾成圓
寄言飛鳧鳥歲晏同聯翩

至望喜矚目言懷貽劔外知己

聖圖夷九折神化掩三分緘愁赴蜀道題拙
奉虞薰隱麟度深谷遙裊上高雲碧流迤縈
注青山互糾紛無由召宣室何以吞吾君

赤谷安禪師塔

獨坐巖之曲悠然無俗紛酌酒呈丹桂思詩
贈白雲煙霞朝晚聚猿鳥歲時聞水華競秋
色山翠含夕暉高談十二部細覈五千文如
如數冥昧生生理氛氲古人有糟粕輪扁情
未分且當事芝朮從吾所好云

贈益府裴錄事

忽忽歲云暮相望限風煙長歌欲對酒危坐
遂停絃停絃變霜露對酒懷朋故朝看桂蟾
晚夜聞鴻鴈度鴻度何時還桂晚不同攀浮

雲映丹壑明月滿青山
雲路深丹壑月華臨
耿耿離憂積空令星髮侵

贈益府群官

一鳥自北燕飛來向西蜀
單棲劔門上獨舞崑山足
昂藏多古貌哀怨有新曲
群鳳從之遊問之何所欲
答言寒鄉子飄飄萬餘里
不息惡木枝不飲盜泉水
常思稻梁遇願棲梧桐樹
智者不我邀愚夫余不顧
所以成獨坐耿耿歲云暮
日夕苦風霜思歸赴洛陽
羽翮

毛衣短關山道路長
明月流客思白雲迷故鄉
誰能借風便一舉凌蒼蒼

送梓州高參軍還京

京洛風塵遠褒斜煙霧深
北遊君似南飛我異禽
別路琴聲斷秋山猿鳥吟
一乖青巖酌空佇白雲心

大劔送別劉右史

金碧禺山遠關梁蜀道難
相逢屬晚歲相送動征鞍
地咽綿川冷雲凝劔閣寒
倘遇忠孝

所為道憶長安

同臨津紀明府孤鴈

三秋違北鴈萬里向南翔
河洲花稍白關塞葉初黃
避繳風霜勁懷書道路長
水流疑箭動月照似弓傷
橫天無有陣度海不成行
會看刷鳴羽還赴上林鄉

戰城南

將軍出紫塞冒頓在烏貪
笳喧鴈門北陣翼龍城南
琯弓夜宛轉鐵騎曉參驪
應須駐白

日為待戰方酣

十五夜觀燈

錦里開方宴蘭缸艷早年
綰彩遙分地繁光遠綴天
接漢疑星落依樓似月懸
別有千金笑來映九枝前

七言古詩

長安古意

長安大道連狹斜青牛白馬七香車
玉輦縱橫過走第金鞭絡繹向侯家
龍銜寶蓋承朝

日鳳吐流蘇帶晚霞百丈遊絲爭繞樹一群
嬌鳥共啼花啼花戲蝶千門側碧樹銀臺萬
種色複道交窓作合歡雙闕連甍垂鳳翼梁
家畫閣天中起漢帝金莖雲外直樓前相望
不相知陌上相逢詎相識借問吹簫向紫煙
曾經學舞度芳年得成比目何辭死願作鴛
鴦不羨仙比目鴛鴦真可羨雙去雙來君不
見生憎帳額繡孤鸞好取開簾帖雙燕雙燕
雙飛繞畫梁羅幃翠被鬱金香片片行雲着

蟬鬢纖纖初月上鴉黃鵲黃粉白車中出含
嬌含態情非一妖童寶馬鐵連錢娼婦盤龍
金屈膝御史府中烏夜啼廷尉門前雀欲栖
隱隱朱城臨玉道遙遙翠幃沒金堤挾彈飛
鷹杜陵北探丸借客渭橋西俱邀俠客芙蓉
劍共宿娼家桃李蹊娼家日暮紫羅裙清歌
一轉口氛氲北堂夜夜人如月南陌朝朝騎
似雲南陌北堂連北里五劇三條控三市弱
柳青槐拂地垂佳氣紅塵暗天起漢代金吾

千騎來翡翠屠蘇鸚鵡杯羅襦寶帶爲君解
燕歌趙舞爲君開別有豪華稱將相轉日回
天不相讓意氣由來排灌夫專權判不容蕭
相專權意氣本豪雄青虬紫燕坐春風自言
歌舞長千載自謂驕奢凌五公節物風光不
相待桑田碧海須臾改昔時金階白玉堂即
今惟見青松在寂寂寥寥楊子居年年歲歲
一牀書獨有南山桂花發飛來飛去襲人裾

懷仙引

若有人兮山之曲駕青虬兮乘白鹿往從之
遊願心足披礪戶訪巖軒石瀨孱溪橫石徑
松蘿幕歷掩松門下空濛而無鳥上巉巖而
有猿懷飛閣度飛梁休余馬於幽谷掛余冠
於夕陽曲復曲兮煙薜邃行復行兮天路長
脩途杳其未半飛雨忽以茫茫山坳軋磴連
蹇攀石壁而無據沂泥溪而不前何無情之
白日竊有恨於皇天迴行遵故道通川遍流
潦迴首望群峯白雪正溶溶珠爲闕兮玉爲

樓青雲蓋兮紫霖裘
天長地久時相憶
千齡萬代一來遊

行路難

君不見長安城北渭橋邊
枯木橫槎卧古田
昔日含紅復含紫
常時留霧亦留煙
春景春風花似雪
香車玉輦恒闐咽
若箇遊人不競攀
若箇娼家不來折
娼家寶抹蛟龍帔
公子銀鞍千萬騎
黃鸞一一向花嬌
青鳥雙雙將子戲
千尺長條萬尺枝
月桂星榆相蔽虧
珊瑚

瑚葉上鴛鴦鳥
鳳凰巢裏雛鸕兒
巢空枝折飛鳳去
條枯葉落任風吹
一朝憔悴無人問
萬古摧殘君詎知
人生貴賤無終始
倏忽須臾難久恃
誰家能駐西山日
誰家能堰東流水
漢家陵樹滿秦川
行來行去盡哀憐
自昔公卿二千石
咸擬榮華一萬年
不見朱唇將玉貌
唯聞青棘與黃泉
金貂有時須換酒
玉麈恒搖莫計錢
寄言坐客神仙署
一生一死交情處
蒼龍闕下君不留
白鶴山頭我應去

雲間海上邈難期赤心會合在何時但願堯
年一百萬長作巢由也不辭

明月引

洞庭波起兮鴻鴈翔風瑟瑟兮野蒼蒼浮雲
卷靄明月流光荆南兮趙北碣石兮瀟湘澄
清規於萬里照離思於千行橫桂枝於西第
繞菱花於北堂高樓思婦飛蓋君王文姬絕
域侍子他鄉見胡鞍之似練知漢劍之如霜
試登高而極目莫不變而廻腸

失群鴈并序

溫縣明府以詩垂示余以爲古之郎官出宰
百里今之墨綬入應千官事止鴈行未宜傷
嘆至如羸卧空巖者乃可爲失群動耳聊因
伏枕多暇以斯文應之

三秋北地雪皚皚萬里南翔渡海來欲隨石
燕沉湘水試逐銅烏繞帝臺帝臺銀闕距金
塘中間鷓鴣已成行先過上苑傳書信暫下
中州戲稻梁虞人負繳來相及齊客虛弓忽

具傷毛翎頻頻飛無力羽翮摧頽君不識唯
有莊周解愛鳴復道郊重竒色惆悵敬思
悲未已徘徊自憐中罔極傳聞有鳥集朝陽
詎勝仙鳧邇帝鄉雲間海上應鳴舞遠得鷗
絃猶獨撫金龜全寫中年印玉鵠當變菜蕪
釜願君弄影鳳凰池時憶籠中摧折羽

盧照鄰集卷上

盧照鄰集卷下

五言律詩

隴頭水

隴阪高無極征人一望鄉關河別去水沙塞
斷歸腸馬繫千年樹旌懸九月霜從來共鳴
咽皆是爲勤王

巫山高

巫山望不極望望下朝氛莫辨啼猿樹徒看
神女雲驚濤亂水脉驟雨暗峰文霑裳卽此

地况復遠思君

芳樹

芳樹本多奇年華復在斯結翠成新幄開紅
滿故枝風歸花歷亂日度影參差容色朝朝
落思君君不知

入秦川界

隴阪長無極蒼山望不窮石徑縈疑斷回流
映似空花開綠野霧鶯轉紫巖風春芳勿遽
盡留賞故人同

文翁講堂

錦里淹中館岷山稷下亭空梁無燕雀古壁
有丹青槐落猶疑市苔深不辨銘良哉二千
石江漢表遺靈

石鏡寺

古墓芙蓉塔神銘松柏煙鸞沉仙鏡底花漫
梵輪前鉢衣千古佛寶月兩重圓隱隱香臺
夜鍾聲徹九天

雨雪曲

虜騎三秋入關雲萬里平雪似胡沙暗冰如
漢月明高闕銀爲闕長城玉作城節旄零落
盡天子不知名

昭君怨

合殿恩中絕交河使漸稀肝腸隨玉輦形影
向金微漢地草應綠胡庭沙正飛願逐三秋
鴈年年一度歸

折楊柳

倡樓啓曙扉楊柳正依依鶯啼知歲隔條變

識春歸露葉凝愁黛風花落舞衣攀折將安
寄軍中音信稀

梅花落

梅嶺花初發天山雲未開雪處疑花滿花邊
似雪迴因風入舞袖雜粉向粧臺匈奴幾萬
里春至不知來

辛司法宅觀妓

南國佳人至北堂羅薦開長裙隨鳳管促柱
送鸞杯雲光身後落雪態掌中回到愁金谷

晚不恠玉山頽

春晚山庄率題二首

顧步三春晚
田園四望通
遊絲橫惹樹
戲蝶亂依藂
竹懶偏宜水
花狂不待風
唯餘詩酒意
當了一生中

田家無四鄰
獨坐一園春
鶯啼非選樹
魚戲不驚綸
山水彈琴盡
風花酌酒頻
年華已可樂
高興復留人

江中望月

江水向涪陽
澄澄寫月光
鏡圓珠溜徹
弦滿箭波長
沉鈎搖兔影
浮桂動丹芳
延照相思夕
千里共霓裳

明月引

筮仕無中秩
歸耕有外臣
人歌小歲酒
花舞大唐春
草色迷三徑
風光動四隣
願得長如此
年年物候新

益州城西張超亭觀妓

落日明歌席
行雲逐舞人
江前飛暮雨
梁上

下輕塵冶服看疑畫粧樓望似春高車勿遽
返長袖欲相親

還京贈別

風月清江夜山水白雲朝萬里同為客三秋
契不凋戲鳧分斷歸騎別高標一去仙橋
道還望錦城遙

至陳倉曉晴望京邑

拂曙驅飛傳初晴帶曉涼霧斂長安樹雲歸
仙帝鄉澗流漂素沫巖景藹朱光今朝好風

色延瞰極天莊

晚渡浮沱敬贈魏大

津谷朝行遠冰川夕望曛霞明深淺浪風卷
去來雲澄波泛月影激浪聚沙文誰忍仙舟
上攜手獨思君

相如琴臺

聞有雍容地千年無四鄰園院風煙古池臺
松檟春雲疑作賦客月似聽琴人寂寂啼鶯
處空傷遊子神

酬楊比部員外暮宿琴堂朝躋書閣
率爾見贈之作

閑拂簷塵看鳴琴候月彈桃源迷漢姓松樹
有秦官空谷歸人少青山背日寒羨君栖隱
處遙望在雲端

五言排律

西使無送孟學士南遊

地道巴陵北天山弱水東相看萬餘里共倚
一征蓬零雨悲王粲清尊別孔融徘徊聞夜

鶴悵望待秋鴻骨肉胡秦外風塵關塞中唯
餘劒鋒在耿耿氣成虹

送鄭司倉入蜀

離人丹水北游客錦城東別意還無已離憂
自不窮隴雲朝結陣江月夜臨空關塞疲征
馬霜氛落早鴻潘年三十外蜀道五千中送
君秋水曲酌酒對秋風

綿州官池贈別

輜軒遵上國仙佩下靈關尊酒妨無地聯綬

喜暫攀離言欲贈策高辯正連環野逕游雲
斷荒池春草班殘花落古樹度鳥入澄灣欲
叙他鄉別幽谷有綿蠻

還赴蜀中貽示京邑遊好

禦宿花初滿章臺柳尚飛如何正此日還望
昔多違悵別風其阻將乖雲會稀歛衽辭丹
闕懸旗陟翠微野禽喧戍鼓春草變征衣回
顧長安道關山起夕霏

和夏日幽莊

聞有高蹤客耿介坐幽庄林壑人事少風煙
鳥路長瀑水含秋氣垂藤引夏涼苗深全覆
隴荷上半侵塘釣渚青鳧沒村田白鷺翔知
君振竒藻還嗣海隅芳

山庄休沐

蘭署乘閒日蓬扉狎遁棲龍柯踈玉井鳳葉
下金堤川光搖水箭山氣上雲梯亭幽聞啾
鶴窓曉聽鳴雞玉軫臨風奏瓊漿映月攜田
家自有樂誰肯謝青谿

山林休日田家

歸休乘暇日，饁稼返秋陽。
徑草疏王篲，巖枝落帝桑。
耕田虞訟寢，鑿井漢機忘。
戎葵朝委露，齊棗夜含霜。
南澗泉初冽，東籬菊正芳。
還思北窓下，高卧偃羲皇。

宴梓州南亭得池字

二條開勝迹，大隱叶冲規。
亭閣分危岫，樓臺遶曲池。
長薄秋煙起，飛梁古蔓垂。
水鳥翻荷葉，山虫交桂枝。
遊人惜將晚，公子愛忘疲。
願

得廻三合琴尊長若斯

酬長少府東

昔余與夫子，相遇漢川陰。
珠浦龍猶卧，檀溪馬正沉。
價重瑤山曲，詞驚丹鳳林。
十年睽賞慰，萬里隔招尋。
毫翰風期阻，荆衡雲路深。
鵬飛俱望昔，蠖屈共悲今。
誰謂青衣道，還歎白頭吟。
地接神仙窟，江連雲雨岑。
飛泉如散玉，落日似懸金。
重以瑤華贈，空懷舞詠心。

過東山谷口

不知名利險辛苦滯皇州始覺飛塵倦歸來
事綠疇桃源迷處所桂樹可淹留跡異人間
俗禽同海上鷗古苔依井被新乳傍崖流野
老堪成鶴山神或化鳩泉鳴碧澗底花落紫
巖幽日暮食龜殼天寒御鹿裘不辨秦將漢
寧知春與秋多謝青溪客去去赤松游

送幽州陳叅軍赴任寄呈鄉曲父老

薊北三千里關西二十年馮唐猶在漢樂毅
不歸燕人同黃鶴遠鄉共白雲連郭隗池臺

處昭王樽酒前故人當已老舊壑幾成田紅
顏如昨日衰髮似秋天西蜀橋應毀東周石
尚全霸池水猶綠榆關月早圓寒雲初上鴈
庭樹欲銷蟬送君之舊國揮涕獨潛然

晚渡渭橋寄示京邑遊好

我行背城關驅馬獨悠悠寥落百年事徘徊
萬里憂途遙日向夕時晚鬢將秋滔滔俯東
遊耿耿泣西浮長虹掩釣浦落鴈下星州草
變黃山曲花飛清渭流迸水驚愁鷺騰沙起

狎鷗一起清泥道空思玄灞遊

贈許左丞從駕萬年宮

聞道山之回詔蹕下蓬萊中樞移北斗左轄
去南臺黃山聞鳳笛清蹕侍龍媒曳日朱旗
卷參雲金障開朝參五城柳夕宴栢梁杯漢
時光如月秦祠聽似雷寂寂芸香樹離思獨
悠哉

哭金部韋郎中

金霄初受拜玉地始含香翻同五日尹遽見

一星亡賀客猶扶路哀人遂上堂歌筵長寂
寂哭位自蒼蒼歲時賓徑斷朝暮雀羅張書
留魏主閣魂掩漢家牀徒令永平帝千載罷
撞郎

哭明堂裴簿

締歡三十載通家數百年潘揚稱代穆秦晉
忝姻連風雲洛陽道花月茂陵田相悲共相
樂交騎復交筵始謂調金鼎如何掩玉泉黃
公酒壚處青眼竹林前故琴無復雪新樹但

生煙遽痛蘭襟斷徒令寶劔懸客散同秋葉
人亡似夜川送君一長慟松臺路幾千

同崔錄事哭鄭員外

文學秋天遠卽官星位尊伊人表時彥飛譽
滿司存楚席光文雅瑤山侍討論鳳詞凌漢
閣龜辯罩周圍已陪東嶽駕將逝北溟鯤如
何萬化盡空歎九飛魂白馬西京驛青松北
海門夜臺無曉箭朝奠有虛尊一代儒風沒
千年隴霧昏梁山送夫子湖水弔王孫僕本

多淚沾裳不待猿聞君絕絃曲吞恨更無言
五言絕句

登玉清

絕頂橫臨日孤峯半倚天徘徊拜真老萬里
見風煙

曲池荷

浮香繞曲岸圓影覆華池常恐秋風早飄零
君不知

浴浪鳥

獨舞依盤石群飛動輕浪奮迅碧沙前長懷
白雲上

臨堦竹

封霜連錦砌防露拂瑤堦聊將儀鳳質暫與
俗人諧

含風蟬

高情臨爽月急響送秋風獨有危冠意還將
衰髮同

葭川獨泛

倚棹春江上橫舟石岸前山暝行人斷迢迢
獨泛仙

送二兄入蜀

關山客子路花柳帝王城此中一分手相顧
憐無聲

宿玄武二首

方池開曉色圓月下秋陰已乘千里興還撫
一絃琴

庭搖北風柳院繞南溟禽累宿思方重窮秋

嘆不深

九隴津集

落落樹陰紫澄澄水華碧復有翻飛禽徘徊
疑曳舄

遊昌化山精舍

寶地乘峯出香臺接漢高稍覺真途近方知
人事勞

雜言騷體

五悲詩

悲才難

一悲曰恭聞古之君子兮將遠適乎百蠻何
故違父母之中國從禽獸於末班將矯詞兮
不往將背俗兮不還寧曲成而薄喪不直敗
以厚顏彼聖人兮猶若此况不肖與中間古
往今來邈矣悠哉嵇生玉折顏子蘭摧人兮
代兮俱盡代兮人兮共哀至如左丘失明冉
耕有疾兵法作而猶臚史記脩而下室高明
者鬼瞰其門正直者人怨其筆雖為鏡於前

代終抱痛於今日別有漢陽計掾邠國臺卿
抗希代之奇節負超時之令名坎壈九死離
披再生伊才智之為患故賢哲之所嬰若乃
賈長沙之數竒崔亭伯之不偶思欲削魯史
之高行鉗楊墨之辨口為書為禮驅季俗於
三古之前垂譽垂聲正頽綱於百王之後天
子聞之而欲用群公畏之而莫取徒窘蠢於
泥沙竟龍鍾於塵垢异乎稽之古人則如彼
考之今代又如此近有魏郡王君曰方華陰

楊氏曰亨咸能博達竒偉覃思研精徵孔門
之禮樂吞鬼谷之縱橫嶽秀泉澄如川如陵
高談則龍騰豹變下筆則煙飛霧凝王則官
終於郡吏楊則官止於邑丞何異夫操太阿
以烹小鮮飛夜光而彈伏翼灼金龜兮訪兆
邀玉騏兮騁力雖勞形而竭思吾固知其不
得余之昆兮曰杲之余之季兮曰昂之杲也
杲杲兮如三足之鳥昂也昂昂焉如千里之
駒杲之為人也風流儒雅為一代之和玉昂

之爲人也文章卓犖爲四海之隋珠並蘭馨
兮桂郁俱龍駒兮鳳雛生於戰國則管樂之
器長於闕里則游夏之徒以方圓異用遭遇
殊時故才高而位下咸默默以遲遲青青子
襟兮時向晚黃黃我綬兮鬢如絲昆兮何責
坐乾封兮老矣季兮何負橫武陵而棄之舉
天下兮稱屈何暗室之足欺爲小人之所笑
爲通賢之所悲童子尚知其不可矧衡鏡與
著龜故曰至道之精窅窅冥冥至道之極昏

昏默默焚符破璽而人朴鄙剖斗折衡而人
不爭捩工倖之指而天下始巧膠離婁之目
而天下始明然後除其矯黠之患安其性命
之精太平之代萬物肫肫允聖昭合賢愚滑
昏公卿不接友長吏不迎尊當成康勿用何
暇談其兵甲典謨旣作焉得耀其書論雖有
晏嬰子產將頓伏於閭巷雖有冉求季路且
耕牧於田園得尋常之才子又焉可以勝言
命鸞鳳兮逐雀驅龍驥兮捕鼠使掌事者校

其功兮孰能與狸隼而齊舉金爲舟兮璚瑁
檝不可以涉丘陵些珠爲衣兮翡翠裳不可
以混樵蒸些何器用兮之乖刺悼斯人之勤
麥倚長巖以爲枕兮吸流光以高卧見城市
以盈虛若蛟蟲之相過當其時也巢由滿野
不知稷卨之尊周召盈朝莫救夷齊之餓若
夫管仲不遇齊桓則城陽之贅壻太公不遭
姬伯亦棘津之漁夫一仁一義柴也來兮由
也醢一忠一孝微子去兮箕子奴聖人百慮

而一致君子同歸而殊塗推旣焚兮胥旣溺
桀亦放兮文亦拘笙簧六籍則秦俗有坑儒
之痛黼藻百行則漢家有黨錮之誅鄴都傾
覆飛禍纏於高鼻洛陽板蕩橫死坐其無鬚
喔咿嚅嘶口含天憲睚眦蠱分屍僵路隅變
化與屈伸交逐窮達與存亡並驅因其所有
而有之則萬物無不有就其所無而無之則
萬物無不無有歟而生寧唯混沌無用而飽
何獨侏儒是以蘧伯玉卷兮長卷竊武子愚

兮更愚庭有樹兮樹有荆園有鳥兮鳥有鷦
鷯其鳴矣思諸兄矣荆其悴矣思諸季矣巖
有芳桂隰有棠棣枝龍從兮相樛葉翩翩兮
相翳天之生我胡寧不惠何如吉兮初征悲
終凶於未濟

悲窮道

二悲曰淚流公子傷心久之歷萬古以抽恨
橫八荒而選悲有幽巖之卧客兀中林而坐
思形枯槁以崎嶇足聯蹠以緇釐怕悄兮忽

愴眇眇兮惆悵超遙兮獨蹇淹留兮空谷天
片片而雲愁山幽幽而谷哭露垂泣於幽草
風含悲於拱木徒觀其頂集飛塵尻埋積雪
骸骨半死血氣中絕四支萎隨五管歌缺皮
襞積而千皺衣聯褰而百結毛落鬢禿無叔
子之明眉唇亡齒寒有張儀之羞舌仰而視
睛翳其若夢俯而動身羸而欲折神若存而
若亡心不生而不滅其所居也不爨其所狎
也非人古樹爲伴朝霞作鄰下陰森以多晦

傍恍惚兮無垠松門草合石路苔新公子方
撫其背兮曳其裾曰子非有唐之文士歟燕
地之高門歟昔也子之少則玉樹金枝及其
長則龍章鳳姿立身則淹中不足言其禮揮
翰則江左莫敢論其詩每競競於暗室恒詡
詡於明時常謂五府交辟三臺共推朝紆會
稽之綬夕獻長揚之詞痛私門之禍速惜公
車之詔遲豈期晦明乖序寒燠愆度鱗傷羽
折筋攣肉蠹離披於丹澗之隅殼鯁於數山

之路已焉哉已焉哉崑山玉石忽摧頽事去
矣事去矣古今賢聖悲何已天道如何自古
相嗟項羽帳中之飲荆卿易水之歌何壯夫
之懦節伊兒女之情多惜如蘇武生還温序
死節王陵之母伏劔杞梁之妻泣血事蓋迫
於功名情有兼於貞烈若關羽漢陰田橫海
島孤城已迫疲兵向老離離碣石之鴻冪冪
江潭之草迴首永訣吞聲何道及夫獻帝偷
生懷王受死哀西都之城關憶南荆之朝市

鳳皇樓上隴山雲鸚鵡洲前吳江水一離一
別兮漢家宮掖似神仙獨坐獨愁兮楚國容
華競桃李別有士安多疾顏竒不起馬援困
於壺頭毋耕悲於牖裏平生書劒宿昔琴樽
研精殫於玉冊博思浹於銅渾思欲爲龜爲
鏡立德立言成天下之亶亶定古今之誼誼
一朝溘卧萬事寧論君徒見丘中之饒朽骨
豈知陌上之有遊魂假使百年兮上壽又何
足以存存

悲昔

三悲曰奇峯合沓半隱天緣蘿蒙籠水潺湲
因嵌巖以爲室就芬芳以列筵川谷縈迴兮
迷徑路山嶂重復兮無人煙當訝呀之洞壑
臨決咽之奔泉中有幽憂之子長寂寞以思
禪暮色躊躇朝思綿線形半生而半死氣一
絕而一連自言少一遊宦來從北燕淮南芳
桂之嶺峴北明珠之川東魯則過仲尼之故
宅西蜀則耕武侯之薄田舊鄉舊國白雲邊

飛雪飛蓬暗遠天暫辭薊北千萬里少別昭
丘三十年昔時人物都應謝聞道城隍復可
憐忽憶揚州揚子津遙思蜀道蜀橋人鴛鴦
渚兮羅綺月茱萸灣兮楊柳春煙波淼淼帶
平沙門棧連延狹復斜山頭交讓之木浦口
同心之花嚴君平之上肆戴安道之貧家月
犯少微弔吳中之隱士星千織女乘海上之
仙槎長安綺城十二重金作鳳皇銅作龍蕩
蕩千門如錦綉巖巖雙闕似芙蓉題字於扶

風之柱繫馬於驪山之松灞池則金人列岸
太華則玉女臨峯平明共戲東陵陌薄暮遙
聞北闕鍾洛陽大道何紛紛榮光休氣曉氛
氲交衢近接東西署復道遙通南北軍漢帝
能拜嵩丘石陳王巧賦洛川雲河水河橋木
蘭棧金閨金谷石榴裙曾入西城看歌舞也
出東郊送使君一朝憔悴無氣力曝骸委骨
龍門側當時相重若鴻鐘今日相輕比蟬翼
代情兮共此何余哀之能得使我孤猿哀恣

獨鶴驚鳴蘿月寡色風泉罷聲嗟昊天之不
弔悲后土之無情松架森沉兮戶內掩石樓
摧折兮柱將傾竊不敢當雨露之恩惠長痛
恨於此生

悲今日

四悲曰傾蓋若舊白頭如新嘗為談過其實
辨而悲真自高枕箕穎長揖交親以蕙蘭為
九族以風煙為四隣朝朝獨坐唯見群峯合
杳年年孤卧常對古樹輪囷相弔相哭則有

飢鼯啼夜相慶相賀則有好鳥歌春林麋麋
兮多鹿山蒼蒼兮少人時向南溪汲水或就
東巖負薪百年之中皆為白骨千里之外時
見黃塵平生連袂宿昔銜杯談風雲於城闕
弄花鳥於池臺皆是西園上客東觀高才超
班匹賈含鄒吐枚一琴一書校奇蹤於既往
一歌一詠垂妙製於將來絃將調而雪舞筆
屢走而雲迴自謂闡交永合松契長并通宵
扼腕終日盱衡罵蕭朱為賈豎目張陳為老

兵悲蒼黃兮驟變恨消長之相傾貴而不驕
人皆共推晏平仲死且不朽吾每獨稱楊巨
卿及其騫產摧聯支離括撮七濡首兮將死
尚搖尾兮求活莊西偵而魚窮姬東徂而狼
跋今皆慶弔都斷存亡永闊憑駟馬而不追
寄雙魚而莫達向時之清談尚在今日之相
知已末則有河濱漂母隴上樵夫盤食帶粟
粥面兼麩藜羹一盞濁酒一壺夫負妻戴男
歡女娛攀重巒之岸嶧虛飛澗之崎嶇哀王

孫而進饋問公子之所須因謂余曰可憐可
憐聖人之過久矣君子之罪多焉詩書禮樂
適足哀人之神用宗族朋友不足駐人之顏
年削跡伐樹孔席由來不暖摩頂至足墨突
何時有煙一朝至此萬事徒然自昔相逢把
臂談玄橫彫龍於翠瓦飛縞鳳於瓊筵各自
雲騰羽化谷變鶯遷鳴香車於闕下曳珠履
於君前豈憶荒山之幽絕寧知枯骨之可憐
傳與千秋萬古寄言白日黃泉雖有群書萬

卷不及囊中一錢

悲人生

五悲曰禮樂既作仁義不憊死生有命富貴在天一變一化一虧一全去其外物歸於內篇儒與道方計於前其書萬卷其學千年鍾鼓玉帛蹙躑躅金木水火混合推遷六合之內慕其風兮如市百代之後隨其流兮若川三界九地往返周旋四生六道出沒牽聯碌碌碌碌蠢蠢蠢蠢受苦受樂可悲可憐

有超然之大聖歷曠劫以爲期戒定惠解非因人慈悲喜捨非見思聞儒道之高論乃撞鍾而應之曰止止善男子觀向時之華說乃天子之辨士請弄宜僚之丸以合兩家之美若夫正君臣定名色威儀俎豆郊廟社稷適足誇耀時俗奔競功名使六義相亂四海相爭我者遺其無我生者哀其無生孰與乎身肉手足濟生人之塗炭國城府庫恤貧者之經營捨其有愛以至於無愛捨其有行以至於

於無行若夫呼吸吐納全身養精反於太素
飛騰上清與乾坤合其壽與日月齊其明適
足增長諸見未能永證無生孰與夫離常離
斷不始不終恒在三昧常遊六通不生不住
無所處不去不滅無所窮放毫光而普照盡
法界與虛空苦者代其勞苦蒙者導其愚蒙
施語行事未嘗稱倦根力覺道不以為功所
言未畢儒道二客離席再拜稽首而稱曰大
聖哉丘晚聞道聃今已老徒知其一未究其

術何異夫戴盆望天倚杖逐日蒼蒼之氣未
辨昭昭之光已失嗚呼優優群品遑遑衆人
雖鑿其竅未知其身來從何道去止何津誰
為其業誰作其因一翻一覆兮如掌一生一
死兮若輪不有大聖誰起大悲請北面而趨
伏願終身而教之

Large stylized watermark or seal, possibly reading '國立中央圖書館藏' (Collection of the National Central Library).

Small square seal impression, likely a library or collector's mark.

Vertical text on the right edge of the page, possibly a page number or title fragment, including the characters '十四' (14).

